

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. प्रधानमंत्री नरेंद्र मोदी होर अज्ज सिंगापोर दे राष्ट्रपति थर्मन शन मुगरत्नम हुंदे नै बैठक लाडन।
2. राजौरी च सामने आवा'रदी अंजान बमारी कारण इक्क होर बच्चे दी मौत, जांच लेई टीम गठित, सेहत मंत्री होरें लोकें गी नेही घाबरने दी सलाह दिती।
3. मुखमंत्री उमर अब्दुल्ला होरें शैहरी विकास सरबंधी योजनाएं गी लागू करने लेई लैंड पूलिंग पालसी दी समीक्षा कीती।
4. स्टार्ट अप इंडिया स्कीम दे अज्ज 9 बरे पूरे होई गेन।
5. जम्मू-कश्मीर च मौसम आम तौरा पर खुशक रौहने दे असार, उच्चिएं धारें पर किश टामीं-टामीं थाहरें हल्की हारी बर्फबारी होई सकदी ऐ।

<><><><><><>

PM-Singapore

प्रधानमंत्री नरेंद्र मोदी होर अज्ज नमीं दिल्ली च सिंगापुर दे राष्ट्रपति थर्मन शणमुग रत्नम हुंदे कन्नै मलाटी करडन। सिंगापुर दे राष्ट्रपति होर राष्ट्रपति भवन च राष्ट्रपति द्रौपदी मुर्मू हुंदे कन्नै बी मलाटी करडन। राष्ट्रपति होर उन्दे सम्मान च रूट्टी दा आयोजन बी करडन। विदेश

मंत्री डॉ. एस जयशंकर होरें कल नमीं दिल्ली च सिंगापुर दे राष्ट्रपति हुंदे कन्नै बैठक कीती।
दौनें नेताएं सैमीकंडक्टर, औद्योगिक पार्क, कौशल विकास, डिजिटलीकरण ते ब्यौरेवा बदाने च
सहयोग पर विचार-विमर्श कीता। जयशंकर होरें इक सोशल मीडिया पोस्ट च आखेआ जे दौनें
मुखें दे दपक्खी सरबंधें दे 60 बरे पूरे होआ करदे न ते इस मौके पर सिंगापुर दे राष्ट्रपति
हुंदी भारत जातरा कन्नै व्यापक सांझेदारी गी नमीं रफ्तार थोग।

<><><><><><>

Rajouri

सरकारी मेडिकल कॉलेज च कल चिरें रातीं इक होर बच्चे दी राजौरी च फैली दी अंजान बमारी
करी मौत होई गई। इसी दिखदे होई पुस नै 11 मिम्बरें दी विशेष टीम दा गठन कीता ऐ जेड़ी
इस मामले दी बजह ते कारणें दा पता लाग। पिछले तकरीबन 45 दिनें च राजौरी जिले दे
बडाल ग्रांs च इस अंजान बमारी करी केई मौता होइयां न। 10 बरे दे जागत दी मौती मगरा
इस अंजान बमारी करी मरने आहलें दी गिनतरी 15 तगर जाई पुज्जी ऐ। इस मामले पर
बोलदे होई सेहत ते मेडिकल शिक्षा मंत्री स्मीना इतू होरें आखेआ जे जांच जारी ऐ ते एहदे
कारणें दा पता लाया जा करदा ऐ। उनें लोकें थवां शात रौहने ते प्रशासन गी सहयोग करने लेई
आखेआ।

<><><><><><>

CM-Meeting

मुख्यमंत्री उमर अब्दुल्ला होरें प्रस्तावित शैहरी योजना स्कीमें ते नीतिएं दी अमल आवरी बारें
चर्चा करने लेई कल केई सारी बैठकें दी अध्यक्षता कीती जिंदा मकसद जम्मू-कश्मीर दे शैहरी

इलाकें दे सरूप गी बेहतर, सनाखड़ा ते बवस्थित बनाना ऐ। बैठकें च मुखमंत्रि होरें गी लैंड पूलिंग पालसी बारे तफसीली जानकारी दिती गई जेदे च एहदा मकसद पछोक्कड़, नियम ते दिशा-निर्देश बी शामिल न। इस पालसी तैहत निजी जिमी मालक, कुसै कारोबारी जां डवेलपर कन्नै मिलिए सांझे तौरा पर जिमी दे इस्तेमाल लेई मंजूरी लेई सकदे न। एहदे नै घर मकान बनाने गी बढ़ावा थहोग, रोजगार दे मौके पैदा होंगन ते आम आदमी लेई अपना मकान हासल करना बी असान होग। निर्माण कम्में लेई मंजूरी दिंदे लै निर्माण थाहरें पार्क, चैड़ी सड़कें, खुल्ली थाहरें ते होरनें सुविधाएं दी बी पक्की बवस्था रक्खी जाग। मीटिंगें च मुखमंत्रि हुंदे सलाहकार नासिर असलम वाणी, मुख सचिव अटल डुल्लू ते होर सीनियर अफसर बी मजूद हे।

<><><><><><>

PM-Mann ki Baat

प्रधानमंत्री नरेंद्र मोदी होर म्हीने च इक बारी प्रसारित होने आहले अपने रेडियो कार्यक्रम मन की बात राएं इस बारी 19 जनवरी गी अपने विचार देश विदेश च रौहने आहले श्रोताएं कन्नै सांझे करंगन। उआं ते एह प्रोग्राम म्हीने दे खीरी ऐतवार गी बड्डलै 11 बजे प्रसारित होंदा ऐ पर ऐकती खीरी ऐतवार 26 जनवरी होने कारण एहदा प्रसारण इक हफ्ता पैहले कीता जा रदा ऐ। एह इस कार्यक्रम दी 118मीं किशत होग। इस कार्यक्रम च शामिल करने लेई अपने सुझा 11 जनवरी तगर भेजी सकदे न। श्रोता अपने सुझा टोल फ्री नंबर 1800-11-7800 पर जां फही नरेंद्र मोदी ऐप जां माई गोव ओपन फोरम पर बी भेजी सकदे न।

<><><><><><>

[Div.Com R'Day Invitaion](#)

जम्मू दे डिविजनल कमिशनर रमेश कुमार होरें ओंदे गणतंत्र दिवस समारोह च बदी चढ़िए हिस्सा लैने दी अपील कीती ऐ। एम.ए स्टेडियम च 29 तरीक गी बीटिंग रिटरल समारोह दा सरिस्ता कीता जाग। इस दौरान सुरक्षा बलें दे बैंड्स मन मोही लैने आहिलियां धुनां बजांदे न। नागरिकें गी एहदा अनुभव करने ते देशभक्ति दे जज्वे आहले इस कार्यक्रम च हिस्सा लैने लेई साद्दा दिता गेआ ऐ।

<><><><><><>

Announcement

आकाशवाणी जम्मू दे खेत्तरीय समाचार एकांश आसेआ कठुआ जिले लेई अंशकालिक संवाददाता लेई दरखास्तां मंगियां गेइयां न। इच्छुक आवेदक जेदी उमर 24 थवां 50 बरें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा अनुभव होना लोइचदा। मेदवार गी कम्प्यूटर खबर बनाने, मीडिया कवरेज दा अनुभव सने सरबंधी लोइचदे उपकरण दा इस्तेमाल बी करना आना चाइदा। आवेदक जिला सदर दफ्तर दी 10 किलोमीटर दी हद दे अंदर-अंदर रोहंदा होना चाइदा। दरखास्त ते लोइचदे दस्तावेज दी कॉपी मेदवार गी खेत्तरीय समाचार एकांश आकाशवाणी पंजतीर्थी जम्मू पिन कोड 180001 पर 15 फरवरी 2025 थवां पैहले-पैहले आइए जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Start Up India

सरकार दी मती तरजीह आहली ते महत्वकांक्षी फ्लैगशिप पैहल स्टार्ट अप इंडिया गी शुरू होए दे अज्ज 9 बरे पूरे होई गेन। इस योजना दा मकसद मुख्यै च आपूं अपना कम्म शुरू करने ते स्टार्ट अप उद्यमिं गी बढ़ावा देना ऐ। 1 लख 59 जहार स्टार्ट अप्स कन्नै भारत दुनिया दा त्रीया सब्बनै शा बड़डा स्टार्ट अप ढांचे आहला मुख्य बनी गेदा ऐ। भारत च स्टार्ट अप्स राएं 16 लख कोला मते लोकें गी सिद्धा रोजगार थोंदा ऐ। स्टार्ट अप इंडिया पैहले तैहत कई फ्लैगशिप स्कीमां बी शुरू कीतियां गेदियां न जिंदे शा फैयदा हासल करियै केई नौजवानें अपना कम्म शुरू करियै होरनें गी बी रोजगार दिता ऐ ते आत्मनिर्भर बने न।

<><><><><><>

Ramban Traffic

रामबन ट्रैफिक पुलिस विभाग नै सड़कें पर गड़्डियां चलाने आहले ते सड़कें पर चलने आहलें दी सुरक्षा गी यकीनी बनाने लेई केई चाल्ली दे जागरूकता अभियान शुरू कीते दे न। इस्सै कड़ी दे तैहत हाल च गै बड़डिं ते हौलिं गड़डिं दे ड्राइवरें लेई इक व्यापक जागरूकता मुहिम चलाई गेई जेदा मकसद सड़कें पर ट्रैफिक नियमें दी खलाफवर्जी रोकना, बगैरा लाइसेंस दे गड़डी चलाने पर सख्ती नै तक्क रखना ते रोक लाना, तेज रफ्तार जां शराब पीए गड़डी चलाने दे खतरे बारें जागरूकता फैलाना हा तां जे सड़कें पर हादसैं दा खतरा टली सकैं ते गड़डिं दी रमानदारी ते बवस्था आहले ढंगै सिर आओजाई जकीनी बनी सकैं। गड़डिं दे ड्राइवरें गी जागरूक कीता गेआ जे किस चाल्ली ट्रैफिक नियमें दी पालमा करियै सड़कें पर सब्भनै दी सुरक्षा गी यकीनी

बनाया जाई सकदा ऐ। इस बारै आकाशवाणी कन्नै गल्ल करदे होई एसएसपी ट्रैफिक रामबन रोहित बस्कोत्रा।

<><><><><><>

DC-Reasi

रियासी दी डिप्टी कमिशनर निधि मलिक होरें दिल्ली-अमृतसर-कटड़ा एक्सप्रेस-वे दा दोमेल कटड़ा आहली थाहर जाइयै जायजा लैता। उनें इस थाहर पर कम्मै दी प्रगति च आवा रदी रूकावटें गी दूर करने लेई चर्चा बी कीती। अपने दौरे दौरान उनें महत्वै आहले ढांचे, कब्रीस्तान ते स्कूल वगैरा करी आवा रदी रूकावटें गी दूर करने आस्तै मुतल्लका अधिकारिणं गी हिदायत कीती तां जे कम्म सुचारू ढंगै सिर होई सकै।

<><><><><><>

DC-Poonch

पुंछ दे डिप्टी कमिशनर विकास कुंडल होरें पुंछ दे पावर हाउस दा दौरा लाया। उनें मकामी बसनीक सतपाल सिंह गी प्रधानमंत्री सूर्या घर मुफ्त बिजली योजना थवां लाह ठोआने लेई उनेंगी मुबारकबाद दिती। सतपाल होरें हाल च गै छत पर सोलर पैनल आहला ढांचा कायम कीता ऐ। अपने दौरे दौरान डिप्टी कमिशनर होरें लाभार्थी कन्नै गल्लबात कीती। सतपाल होरें सरकार दी इस महत्वपूर्ण पैहलकदमी प्रति आभार जताया। एहदे राहें लोके गी अपनी बिजली आपूं पैदा करने दा इक मौका हासल हुंदा ऐ।

<><><><><><>

DDC-Kishtwar

किश्तवाड़ दे जिला विकास कमिशनर राजेश कुमार शवन होरें प्रधानमंत्री आवास योजना ग्रामीण दे तैहत आवास प्लस दे दुए गेड़ गितै सर्वेक्षण करने लेई कम्मै पर लाए गेदे लोकें लेई इक रोजा कार्जशाला ते सिखलाई कार्जक्रम दा सरिस्ता कीता गेआ। ग्रामीण विकास ते पंचैती राज मैहकमे आसेआ आयोजित इस कार्जक्रम दा मकसद इस कम्मै लेई ग्राम पंचैतें चा सर्वे करने लेई ताले गेदे 136 लोकें गी सर्वेक्षण दी प्रक्रिया ते तौर-तरीकें दे बारें च जानकारी कन्नै लैस करना हा। इस कम्मै च आवास प्लस मोबाइल ऐप दा इस्तेमाल करने दी जांच सखाना बी शामिल ऐ। एहदे माहिर मास्टर ट्रेनर इम्तियाज खान ते अकरब मिंटू होरें इस कर्जक्रम दौरान सखेत्रु सर्वेयरें गी पूरी प्रक्रिया दे बारें च जानकारी ते सिखलाई दिती।

<><><><><><>

Weather

जम्मू-कश्मीर च मौसम औने आहले दिनें च आम तौर पर खुशक रौहग पर अज्ज टामी-टामी थाहरें पर बर्फबारी होई सकदी ऐ। मौसम विभाग नै 19 जरवरी तगर मौसम च कुसै बड्डे बदलाव दी मेद जाहिर नेई कीती ऐ। जम्मू-श्रीनगर राष्ट्रीय जरनैली शिड़क गड्डिएं दी आओजाई लेई खुल्ली दी ऐ। राजौरी ते पुंछ गी कश्मीर घाटी दे शोपियां कन्नै जोड़ने आहली शिड़क गड्डिएं दी आओजाई लेई बंद ऐ।

<><><><><><>